

Editorial

Proyecto Citgo ta un bofta den cara di Aruba

Berdad nunca a perhudica ningun hende ningun causa ni ningun nacion. Cu e lema aki, na porta di Status Aparte y e futuro liber y democratico di Aruba, DIARIO a ser entrega na Aruba como defensa di bienestar di e pais.

Awe ta cu orguyo gerencia y personal ta confronta Aruba y ta duna testimonio di a keda fiel na e lema di fundado di DIARIO, Jossy Mansur.

E aña tras di lomba sigur no tabata facil. Na 2018 a bira evidente cu e proyecto Citgo cu a ser presenta como e solucion pa Aruba na 2016, no por a ser realisa manera a ser planea.

DIARIO a asumi e responsabilidad cu e confianza di pueblo di Aruba den su informacion a exigí y a duna pueblo tur splicacion riba e proyecto, cu mas y mas a demostra di tabata un bofta pa den cara di Aruba.

Pasa a paso nos tabata presenta informacion tocante e acuerdo entre gobierno di Nicolas Maduro y Gobierno anterior di Aruba.

No tabata facil splica pueblo di Aruba cu e pais a bira victima di un engaño politico, cu ta trancan economia di Aruba y ta un di e motibonan pa cual awe Aruba ta den crisis y parti di publicacionnan negativo rond mundo.

Awe no ta DIARIO ta papia di loke a pasa Aruba ora gobierno anterior a trapa riba democracia y contra ley a pasa e acuerdo di Citgo den Parlamento di Aruba. Cu prueba hasta di e interes Ruso den e compania, nos a habri wowo di Aruba.

Despues cu nos na laga diferente instancia muestra con a kibra ley y regla cu e acuerdo, con a bay contra interes di Aruba y e peliger grandi cu a hinca Aruba aden, Venezuela mes ta confirma loke DIA-

RIO a presenta cu tabata e berdad y nada mas cu e berdad.

Gobierno anterior a pone Aruba baila pa un proyecto cu casi a destrui Aruba. E pais a scapa cu Aruba no a keda den rian di Gobierno di Mike Eman, cu te na ultimo momento tabata gaña Aruba.

Tur instancia oficial y institucional na nos pais a haci nan trabou. Nan informacionnan a keda desconoci pa pueblo mescos cu e contrato cu a mira luz di publicidad ora un gobierno nobo a sinta y na 2018 a entrega e acuerdo na Parlamento di Aruba.

E bofta den cara di nos pais, ta haci dolor. Un pais honesto awe ta na discusion pa motibo di placa di Citgo, cu manera nos a trece dilanti na tanto ocasion y cu tanto prueba publica, tabata pasa pa gobierno di Nicolas Maduro.

Citgo tabata e baca di lechi cu a alimenta regimen Maduro y tabata un berguena cu Aruba a firma un contrato cu e regimen.

Awe tur berdad ta riba mesa. Manera DIARIO for di momento cu Presidente Juan Guaidó a cambia gerencia di Citgo a trece dilanti, investigacion a cuminsa pa haya sa unda placa di Venezuela a bay. Aruba su nomber ta den un luz negativo na mundo, cu a adverti Gobierno Mike Eman pa e contrato cu Citgo.

DIARIO ta exigí pa husticia ser haci cu Aruba y pa e caso aki wordo investiga dor di Reino. Hamas Aruba lo lubida e bofta cu el a ribi ora su nomber ta ser ponijunto cu e gobierno di Venezuela cu mundo liber ta denuncia pa crimen sin igual.

Nos lo sigui e desaroyonan di acerca pa sigui informa Aruba, nos pais, cu semper a tene su cara na halto y hama por a pensa cu e lo ta parti di un scandal mundial.

Segun ehecutivonan di Guaidó den PDVSA:

US\$ 260 miyon a sali pa refinaria di Aruba pero 80 so a yega

* 180 miyon a dispare na caminda

ORANJESTAD (AAN)

Minister Presidente, den conferencia di prensa di gobierno, dunando un update encunto e situacion di e refinaria di Aruba, el a reitera cu e situacion ta birando cada bez mas dificil.

E placa no ta pasando loke ta nifica cu e refinaria no ta hayando fondo y asina e compania no por sigui mantene e trahadornan mas den servicio, y a cuminsa retira mas hende.

E dignatario a referi na un encuentro di un delegacion di Aruba cu ehecutivonan di PDVSA na Miami, unda e conversacionnan a bay den bon sentido. E reunion aki tabata cu dirigentenan nobo di PDVSA, cu a wordo apunta pa Juan Guaidó, presidente interino di Venezuela.

Minister Presidente a reitera cu den su conversacion cu



Juan Guaidó siman pasa, el a splike cu ainda e no tin e control di PDVSA, pero e funcionarionan cu a reuni cu e delegacion di Aruba ta hendenan di Guaidó.

E dignatario a duna di conoce cu loke a bin padilanti ta algo cu e no a tene cuenta cune, adelanta y a comenta cu e grupo nobo cu a drenta den PDVSA awor, tin un desconfianza hopi grandi riba e proyecto di Aruba.

"Segun nan calculonan for di e cuentanan bancario di PDVSA na Merca, 260 miyon a wordo inverti den e refinaria na Aruba; sinembargo, aworaki cu nan ta wak bek, ta 80 y pico miyon so a wordo inverti na Aruba. Pues, 260 miyon dollar a sali for di e cuenta bancario y 80 y pico a yega. Na caminda 180 miyon a dispare". Minister Presidente a señala. E dignatario a

indica cu esaki ta algo cu ta crea hopi desconfianza di banda di e grupo Guaidó di PDVSA, y e desconfianza aki ta riba tur tereno.

"Desconfianza cu si di 260 miyon 80 miyon ta yega, kico ta pasa cu 15 miyon si nan lante aworaki? Si nan coopera cu e licencia di OFAC aworaki y laga e 15 bay, ta kico ta yega Aruba y cu hopi no ta yega?" E mandatario a expresa.

"Pero mas importante, e desconfianza cu nan tin ta cu nan sa cu ta hendenan di e regimen di Maduro cu ta encarga cu PDVSA, ta responsable pa e desaparicion di e placa, pero den nan pensamiento Aruba sea a facilita pa comete fraude cu e placa aki, of tin ex-mandatarioman cu tambe ta involucra den esaki". Prome Minister a bisa.

Premier Wever-Croes a

agrega cu por imagina cu ora di drenta un reunion na unda ta bay papia: cu e ehecutivonan riba 15 miyon dollar cu tin cu bin pa yuda algun mama y tata di famia mantene nan trabao den e refinaria, anto e delegacion di Aruba ta haya su mes cu e desconfianza di tal magnitud, esey ta cambia henter e escenario.

"Esaki ta treciendo poco tension di ambos banda. Di banda di e refinaria di Aruba (RdA) nan ta insisti cu tin 80 miyon dollar inverti den e proyecto aki y no 260 miyon manera ta wordo bisa. Pues na un caminda e 180 miyon a bay, y esey a crea desconfianza den e hendenan nobo cu a drenta PDVSA. Nos a kere cu hende nobo ta mas confianza, pero tin hende nobo y menos confianza" e dignatario a enfatiza.